

To a Louse by Robert Burns

HA! whare ye gaun, ye crowlan ferlie!
 Your impudence protects you sairly:
 I canna say but ye strunt rarely,
 Owre *gawze* and *lace*;
 Tho faith, I fear ye dine but sparely,
 On sic a place.

Ye ugly, creepan, blastet wonner,
 Detested, shunn'd, by saunt and sinner,
 How daur ye set your fit upon her,
 Sae fine a *Lady*!
 Gae somewhere else and seek your dinner,
 On some poor body.

Swith, in some beggar's haffet squattle;
 There ye may creep, and sprawl, and sprattle,
 Wi ither kindred, jumpin cattle,
 In shoals and nations;
 Whare *horn* nor *bane* ne'er daur unsettle,
 Your thick plantations.

Now haud ye there, ye're out o sicht,
 Below the fatt'rels, snug and ticht,
 Na faith ye yet! ye'll no be richt,
 Till ye've got on it,
 The vera tapmost, towrin hicht
 O *Miss's bonnet*.

My sooth! richt bauld ye set your nose oot,
 As plump and gray as onie grozet:
 O for some rank, mercurial rozet,
 Or fell, red smeddum,
 I'd gie you sic a hearty dose o't,
 Wad dress your droddum!

I wad na been surpriz'd to spy
 You on an auld wife's *flainen toy*;
 Or aiblins some bit duddie boy,
 On 's *wylecoat*;
 But *Miss's fine Lunardi*, fye!
 How daur ye do 't?

O Jenny dinna toss your heid,
And set your beauties aw abreid!
Ye little ken what cursed speed
The blastie's makkin!
Thae *winks* and *finger-ends*, I dreid,
Are notice takkin!

O wad some Pow'r the giftie gie us
Tae see oorsels as ithers see us!
It wad frae monie a blunder free us
An' foolish notion:
What airs in dress and gait wad lea us,
And ev'n Devotion!